



Caras parochianas, cars parochians

Cheu e leu aud'ins il giavisch, ch'ei daventi primavera - mo lu vegn puspei la neiv. Gie, suenter il temps da ferdaglia, neiv e bletsch, han biars da nus il giavisch, ch'il sulegl tarmetti puspei ses radis caulds e clars e clomi la scaffiziun per veta nova; in niev verd cun massa fluras en diversas colurs.

La glisch dil sulegl dat veta e cloma per veta. Tut ha da far cun quella glisch che negin carstgaun sa far. Tut las glischs ch'ils carstgauns han fatg san buc glischar e scaldar sco il sulegl.

Sonda sontga vegn il tscheri pascal, envidaus vid il fiug da Pastgas, purtaus en baselgia stgira, e tenor liunga tradiziun vegn cantau:

"Lumen Christi! - Deo Gratias!"

"Glisch da Cristus! - Engraziament a Diu!"


Ella sontga notg dalla levada ei la glisch il pli ferm simbol en nosa baselgia. Ed ei vegn endament: "La glisch ei vegnida el mund" (Gion 3, 19), ni era il psalm 26: "Il Segner ei mia glisch e miu salit! Da tgi duess jeu ver tema?" (Ps 26,1).



E Jesus Cristus sez di: "Jeu sun la glisch dil mund: Quel che suonda mei, vegn buc a viandar ella stgiradetgna, mobein vegn ad haver la glisch dalla veta". (Gion 8,12).

Aschia cartein nus che s'orientein vid la Buna Nova. Pertgei Cristus ha purtau e porta vinavon sia glisch dalla veta en nossas diversas grevezias. Quella glisch astg'ins buc scumbigliar cun ils reflecturs da quest mund che vulan mo criticar ni cumprometter enzatgi e vulan far glischar mo igl agen egoissem.

Cristus ei la vera glisch che fa cauld. Quella fidonza gida nus da sentir en nosa cuminonza sia presenza e dat a nus la forza e curascha, da sorprender nos pensums dalla veta era en dis stgirs e grevs.



Emblidein nus buca mintgaton quei? Ni essan nus magari buca prompts e semtgai per retscheiver e purtar ei? Cristus va tras la mort alla levada splenduronta. Era nus, entras nosa cardientscha vegnin inagada a suandar el. Lu vegn el denter auter era a dumandar nus: Tgei has ti fatg cun mia glisch ed il cauld, ch'jeu hai regalau a ti? Has ti dau vinavon ei?

Jeu giavischel a Vus tuts ina impressiunonta jamna Sontga ed ina splenduronta e caulda fiasta da Pastgas. Possi la buna nova da Pastgas purtar a nus forza e plascher en nosa cardientscha.

Vies plevon sur Peter

Informaziuns per Laax

Communiun dils malsauns:

Mesjamna, ils 14-04-2010 suentermiezdi

Devoziun dallas mummas e lur affons en baselgia

Cordial invit per mesjamna, ils 14 d'avrel 2010 allas 16.00h.

Tema: La nuorsa piarsa. Nus sperein, che quei tema svegli gust ed interess e che la participaziun seigi numerusa; che negin mondi a piarder!

Radunonza generala dalla Pleiv

Cordial invit a nossa radunonza generala dalla Pleiv che ha liug mardis, ils 13 d'avrel 2010 allas 20.00h ella Sentupada.

Fiasta dall'emprema sontga Communiun

Dumengia, ils 11 d'avrel 2010 astgan 6 affons dalla tiarza classa retscheiver Cristus per l'emprema gada ella sontga Communiun.

Nos affons en legria festiva: *Aron Matteo Cavegn
Noah Coray
Seraina Kälin
Luis Miguel Rodrigues
Mauro Toggenburg
Fabio Zanin*

A vus tuts ed a vossas famiglias gratulein nus da cor e giavischein in sulegliv e benediu di da fiasta.

In cordial engraziament admettein nus alla catecheta Regula Caduff che ha preparau ils scolars.



Informaziuns per Falera

Communiun dils malsauns:

Gievgia, ils 08-04-2010 suentermiezdi

Gievgia, ils 22-04-2010 suentermiezdi

Nozzas a s. Rumetg

Sonda, ils 10 d'avrel 2010 allas 16.00h festiveschan Victoria e Stefan Hiaps lur nozzas. Nus gratulein als nozzadurs e giavischein bia cletg e ventira per lur veta comunabla.

Devoziun dallas mummas e lur affons en baselgia

Cordial invit per mardis, ils 13 d'avrel 2010 allas 16.00h.

Tema: La nuorsa piarsa.

Fiasta dil s. Batten

Dumengia, ils 18 d'avrel 2010 allas 11.30h retscheiva **Andrin Treier**, feagl da Ruedi Gyax e Sabrina Treier, il sogn sacrament dil Batten. Nus giavischein al niev commember dalla baselgia la benedicziun da Diu ed il sustegn dalla cuminonza cartenta.

Fiasta dall'emprema sontga Communiun

Gliendisdis Pastgas, ils 5 d'avrel 2010, festiveschan nos 6 premcommunicants lur emprema s. Communiun. Nus selegrein cun vus e vossas famiglias e giavischein in sulegliv e ventireivel di da fiasta.

Nos affons en legria festiva:

Luis Bärtsch

Joel Cabalzar

Lars Caduff

Jan Casutt


Flurina Schulz

Viviane Wellinger

Cordial engraziament a nossa catecheta Maria Chistell per la preparaziun dils affons. Era a nies Chor baselgia in grond engraziament per lur cant sco era al Cussegl pastoral in Dieus paghi per la preparaziun digl aperitiv suenter messa, che stat en connex cun la fiasta.

FEGL PAROCHIAL Pfarrblatt LAAX – FALERA

Avrel/ April 2010



Uffeci parochial / Kath. Pfarramt

Via principala 68, 7031 Laax, Plevon: Sur Peter Aregger,
Tel. 081 921 41 12, E-mail: aregger.peter@bluewin.ch
Secretaria dallas pleivs: Natalia Gliott Tel. 079 283 45 80
E-mail: kath.kirche.laax@bluewin.ch
Adressa d'internet: www.pleiv-laax-falera.ch

Reformiertes Pfarramt Sagogn-Laax-Falera

Pfarrer Thorsten Minuth, Encarden 24, 7152 Sagogn.
Tel. 081 921 68 55, e-mail: minuth@kns.ch